

Nos Alexander s: Laurentij in Damaso Diaconus Cardinalis de Farnesio S. R. e. Vicecancellarius fidem facimus, et attestamus qualiter hodie, die Mercurij xxvi Januarij M. D. Lxiii Pontificatus s: D. N. D. Pij Divina providentia Papa quarti anno quinto, in Consistorio secreto apud s: Petrum, Reverendiss: DD. mei Cardinalis Moronus et Simoneta, nuper reversi à sacro Conc: Tridentino, cui uti sedis Apostolica Legati praeerant, petierunt ab eodem sanctissimo D. nro, ut infra

Beatissime Pater in Decreto super fine Concilij Oecumenici Tridentini pridie Nonas Decembris praeteriti publicato, statutum fuit, ut per Sanctitatis Vestrae et sanctae sedis Apostolicae Legatos et Praesidentes peteretur nomine dicti Concilij a sanctitate uestra confirmatio omnium et singulorum quae tam sub fel. rec. Paulo iij et Julio iij quam sub Sanctitate Vestra in eo decreta et definita sunt. Quapropter nos Joannes Cardinalis Moronus, et Ludovicus Cardinalis Simoneta, qui tunc Legati et Praesidentes eramus, volentes, exequi quod in dicto Decreto stabilitum fuit, humiliter petimus nomine dicti Concilij Oecumenici Tridentini, ut Sanctitas Vestra dignetur confirmare omnia et singula quae tam sub fel. rec. Paulo iij, et Julio iij, quam sub Sanctitate Vestra in eo decreta et definita sunt.

Quibus auditis, Sanctitas sua, viso et lecto tenore dicti Decreti et habitis votis Reverendiss: DD. meorum Cardinalium respondit per haec verba

Petitioni nomine Concilij Oecumenici Tridentini super eius Confirmatione per dictos Legatos nobis facta annuentes, omnia et singula quae in dicto Concilio tam sub fel. rec. Paulo iij et Julio iij praedecessoribus nostris, quam Pontificatus nostri tempore decreta et definita sunt, auctoritate Apostolica etiam de Venerabilium fratrum nostrorum Cardinalium consilio, et assensu, matura cum illis deliberatione praesabita, confirmamus, atque ab omnibus Christi, fidelibus recipi et inviolabiliter observari mandamus In nomine Patris, et Filij et Spiritus Sancti Amen.

Ita est A. Alexander Cardinalis
Farnesius Vicecancell.